



Kabarett „Sachsenmeyer & Co.“  
09224 Chemnitz  
Feenweg 11

Hauptspielstätte:  
Kabarett-Kiste (im Hedwigshof)  
An der Markthalle 8  
09111 Chemnitz

Bestell-Telefon: 0371 - 694 77 11  
[www.sachsenmeyer-kabarett.de](http://www.sachsenmeyer-kabarett.de)  
e-Mail: sachsenmeyer@t-online.de

### 37. Kalenderwoche – 07. September 2008

Eduard Sachsenmeyer macht sich in dieser Woche Gedanken um die große Politik und die bayerischen Landtagswahlen. Angetan hat es ihm eine Vertreterin des weiblichen Geschlechts namens Pauli. Ja genau, jene Fürther Landrätin, die sich vor geraumer Zeit mit "Bayern-Zar" Edmund Stoiber gekäppelt hat. Doch lesen Sie selbst....

## De Frauengwode

Nu isses doch widdor die Frau Bauli aus Frankn, die in Bayern Schdaub offwirbln dud. Die is widdor voll da. In Bayern hamm die doch jedzde Wahl. Ja, die dud direggd geschn dähn Beggschdein ins Renn gehn!

In dähm sein Wahlbezirk. Un isch will ma sachn, rein von dor Obdigg hähr isse da schon erschdema meilenweid im Vordeel! Un dann hadse ja ooch so scheene Vorschläsche, was mor alles machn kennde so in Bayern un iborhaubd. Zum Beischbiel had se ooch widdor dähn Vorschlach, dass mor de Ehe nach siehm Jahrn erschdema offleesn söllde. Ja, dähn Vorschlach had die widdor mid dabei. Die gibbd nisch off. Die muss bezieschlich Ehe sähr driebe Erfahrungen gemachd hamm!

Nascha, un dann dud se fordorn, dass de Gwode schdimm muss - also, nisch de Loddogwode, sondorn de Gwode zwischn Fraun un Männor in dor Regierung. Die will, dass genauso viel Fraun wie Männor regiern dun. Abor was mach mor dann mid de Schwuln - wo dun mor die hinreschnen? Guhd, da kennde mor sisch schon was ausdenkn, wo mor die hindun kennde. Je nach Hormonkonzendradjohn odor sowas. Abor das is drozdähm erschd dor Anfang von dor Gereschdischkeid.

Dann muss mor nadierhlich ooch de Behindordn beriggsischdischn. Also, nisch bloß geisdisch Behindorde - wie jedzde! Sondern ooch annre. Midm Schräuble is ja erschd

eenor drinne. Un dann nadiehrlich missde de Gwode zwischn Ossis un Wessis gereschdor sein. Mor missde das villeischd ausreschnen ibor de Wahlbedeilichung. Soviel Brozend wie ehm Ossis gewähld hamm, soviel Brozend musses Ossis in dor Regierung gähm.

Un dann isses e absoludor Bleedsinn, dass bloß immor so alde Gnaggor an dor Däde sinn. Un mansche sinn ja sogahr schon rischdisch Rendnr. Es is jednfalls kee Wunnor, wenn die eene Bolledigg machn, die dähr Juchend nisch gefalln dud. Nee - Juchend an de Machd! Odor Kinnor - wie schon ma eenor gesung had. Kinnor an de Machd! Dähr Gröhnemeyor war das!

Ja, de Gwode muss allseidisch schdimm. Es dud nu ma so viele vorschiedne Leide gähm un alle missn se irschendwie in dor Regierung vordrähdn sein. Ehm dursch welsche, die so sinn wie die jeweilische Sorde von Leide. Es kommd off de Ausgewochnheid an. Es darf nisch bloß Dinne gähm, es missn ooch baar Digge hähr. Seid dor Helmud Kohl nisch mähr midmachn dud, is da e dodahles Ungleichgewischd endschdandn. Wischdisch däde villeischd außordähm sein, dass ooch bezieschlich de Schlaun e baar Vordrähdor in de Regierung einziehn missdn. Grade ooch in Bayern! Hinsichdlich dumm un dähmlisch is da e eindeudisches Iborgewischd vorhandn. Nisch bloß in Bayern! Un was de Scheenheid bedreffn dud - fiehr de Nischdscheen hammor genuch Vordrähdor in dor Regierung, abor für de Scheen? Un grade da däde ehm de Frau Bauli werglisch eene Ligge filln. Als de Vordrähdorin von de Scheen! Vordrähdor von de Scheen un Reischn gibbds genuch! Un von de Arm? Das wird schwähr!

*Eduard Sachsenmeyer*